



*Dr. Emsley Tromp:*

## Oumento di kargo di impuesto i prima sosial ta kondusí na ménos empleo

**WILLEMSTAD/PHILIPSBURG** - Kresementu ekonómiko duradero por redusí pobresa i asina kontribuí na prosperidat pa tur gremio di nos komunidad. En efekto e relashon entre kresementu ekonómiko duradero i redukshon di pobresa tin dos direkshon. Di un banda, kresementu ekonómiko duradero lo oumentá empleo, loke lo resultá den mehora di entrada i mayor demanda lokal. Di otro banda, si keda sin atendé pobresa efektivamente, esei lo afektá e potensial di un pais pa logra mayor kresementu ekonómiko.

Den un splikashon di Banko Sentral di Kòrsou i Sint Maarten di e sifranan anual di 2011, presidente Dr. Emsley Tromp ta mèldu entre otro ku kombatimentu di pobresa i kresementu ekonómiko tur dos ta dependé di un klima sano di invershon. E último aki ta duna e siudadano individual i sektor komersial e konfiansa pa usa nan plaka di forma produktivo. Invershonnan privá ta forma e motor di un desaroyo ekonómiko duradero.

Pa e klima di invershon ta atraktivo, ta importante pa gobièrnu promové transparensia di su maneho i redusí burokrasia. Ademas, e sistema di enseñansa mester pèrkurá pa esnan ku kaba skol tin e konosementu i habilitatnan ku merkado di labor tin mester di dje aktualmente. E desishon resien pa hasi enseñansa aksesibel pa tur hende bèrdat ta di aploudí, pero preokupante ta ku ta parse ku no ta dediká atenshon na e kalidat di enseñansa. Pa stimulá puestonan nobo di empleo mester atendé tambe ku aspektonan rígido den merkado laboral. E desishon resien di gobièrnu pa introdusí e asina yamá areglo 80/20, ku ta preskribí ku minimalmente 80% di e empleadonan den un empresa na Kòrsou mester ta lokal, no ta rekomendabel pa redusí e tipo di aspekto rígido aki. Implementashon di e areglo aki sin permití eksepsjon nesenario lo hasi nos merkado di labor ménos fleksibel i a konsekuensia di esei e ta suak nos posishon kompetitivo.

Pobresa por wòrdu redusí mediante un sistema di sosten di entrada inkluiendo supsidio di gobièrnu. Pero e ora ei gobièrnu mester disponé tambe di e espasio pa esei den presupuesto. Na Kòrsou, por ehèmpel, klaramente no tin e espasio den presupuesto pa supsidia enseñansa enteramente riba término kòrtiku òf término mediano sin ku gobièrnu ta baha su gastunan riba otro tereno òf ku e ta subi su base di entrada. Pero oumento di entrada di gobièrnu den un periodo di kresementu ekonómiko debil ta impliká ku ta redusí e forsa di kompra di e konsumidónan, loke tin komo konsekuensia ku e ta limitá e rekuperashon ekonómiko. P'esei gobièrnu mester realisá ku inisiativa pa

sigui subi e kargo di impuesto i prima sosial pa por realisá su intenshonnan di maneho, por kondusí na bahada di forsa di kompra, un kresementu ekonómiko mas abou i un desempleo mas haltu.

E eksperensianan na otro pais durante e último dékadanán ta muestra ku un maneho sosial aktivo ta kontribuí na un redukshon permanente di pobresa. Un maneho asina no ta intentá di niun forma pa hasi hende dependiente di sosten di gobièrnu, pero hustamente e ta yuda nan surpasá e opstákulonán pa por haña trabou. Den esaki ta konta entre otro enseñansa, entrenamentu, kuido pa mucha i transporte públiko. Tambe den e kaso di Kòrsou i Sint Maarten, tur esaki ta áreanan di maneho ku mester atendé pa redusí pobresa permanentemente.

Willemstad, 6 juli 2012

**CENTRALE BANK VAN CURACAO EN SINT MAARTEN**